

Chastè da Marmels – ruina medievale al Lai da Murmarera

■ Il chastè da la signuria dals de Marmels vegn menziunà l'emprima giada il 1193. Il complex è vegnì costruì sut in grip surpendent, aut sur il Lai da Murmarera odiern. Remartgablà è la chapella, da la quala la miraglia è sa mantegnida fin oz. Situà intgins kilometers avant il spartavias da Bivio, serviva il complex a controllà il traffic tant sur il Pass dal Güglia sco er sur il Pass dal Set. Ina conservaziun cumplexiva da la ruina dal chastè ils onns 1987/88 è stada il motiv per analisas architectonicas vi da las restanzas dals edificis e per exchavaziuns archeologicas sin l'areal.

Il chastè

Las ruinas dal complex fortifitgà da Marmels sa chattan bunamain tschient meters sur il lai da serra da Murmarera sut in immens nas da grip. Il chastè tutgava durant il temp autmedieval e temp medieval tardiv als signurs de Marmels ch'eran ministerials da l'uvestg da Cuira. Ina chaplutta cun edificis cunfinants, in tract dal portal ed ina tur d'abitare rappresentativa cun almain quatter plans fachevan pli baud part da la construcziun situada sin in'auzezza snu-aivla a 1710 m s.m.



Sin l'emprim stgalim en sa mantegnidas in pèr restanzas d'in mir da tschinta che suandava l'ur dal grip. Il tract dal portal disponiva d'in edificis d'economia che serviva er sco fravia. Sin la terrassa meridionala sa chattava alura il palas, vul dir la tur d'abitare dal chastè. Cura che Rudolf Rahn ha disegnà il 1893 l'implant steva quest palas anc. Sco ch'i vegn raquintà en la regiun è quel i en muschna la saira da Nadal 1905 pervi d'in terratrembel. La chaplutta, situada sin la terrassa vers nord che sa chat-ta il pli ad aut, è sa mantegnida vaira bain. L'apsida mez radunda è integrada en il mir vers ost, pia sin la vart da la val. Il plan orizzontal da la chaplutta cumpara en Rezia gia in temp carolingic, dast-gass però esser vegnì applitgà en la regi-un fin en il 12avel tschientaner tempriv. Sin in pitschen plateau en il nord da la baselgia han ins chattà restanzas d'in edificis ch'è vegnì costruì pli tard (evtl. l'abitaziun dal plevon). Sin l'avantterren, in pau survart il lai da od, è vegnida a la glisch restanzas d'in claus e d'in pitschen edificis. Probablmain sa tractavi qua d'in manaschi puril che provediva ils abitants dal chastè cun victualias.

Il chastè da Marmels è restà durant tut si'istorgia en possess da la medema famiglia, quai che furma plitost l'excepti-un. Il 1550 cumpara il complex l'ultima giada en las funtaunas. Rudolf de Marmels, il figl da Conradin, ha vendì il chastè ensemen cun la tur da Tinizong ed il chastè Spliatsch a ses nev Hans; quel è però vegnì en retard cun pajar il pretsch da cumpara, uschia che Rudolf ha tegnì enavos il chastè sco pegn. Da quel temp para l'implant anc d'esser stà en in bun stadi ed abitel.

Probablmain è il chastè vegnì bandunà vers la fin dal 14avel u l'entschatta dal 15avel tschientaner; chats pli novs na



Chastè da Marmels.

FOTO MARTIN SCHEEL/AZOOM

datti betg. L'onn 1620 figurescha l'implant er en las funtaunas sco ruina.

La famiglia

Tar ils de Marmels sa tractavi d'ina famiglia da cavaliers e ministerials cun residenza sin lur chastè-fortezza sper Murmarera. L'emprim member attestà è Andreas (1160), ministerial da l'uvestg da Cuira, dal qual el possedeava en feud ina part dal chastè da Tarasp. Il 1193 ha el (u ses figl cun il medem num) rapinà en num da l'imperatur il legat cardinal Cinti-sin la ruta dal Set ed empraschunà el sin ses chastè. Cun plirs members influents da la noblezza retica ha Nannus concludì il 1219 la pasch tranter l'uvestg da Cuira e la citad da Com. Il 1293 cumpara Andreas sco terza perditga tranter ils nobles et barones che conferman l'allianza d'amicizia tranter l'uvestg da Cuira ed il ducadi da Milaun.

Dal 14avel fin il 16avel tschientaner èn stads activs numerus exponents da la famiglia Marmels sco interprediders, ministerials, politichers e spirituals. Els controllavan per gronda part il traffic dal transit sin il Pass dal Set, possedeavan las minieras dal Surses e dapi il 1338 ils implants per l'extracziun da mineral da fier cun galarias e furns en il Val d'Err sper Tinizong. Els èn stads chastellans da l'uvestg da Cuira en diversas valladas, oravant tut a Riom e Greifenstein e cumparan ultra da quai sco derschaders, uffiziers u mess. Johannes era canoni da Cuira il 1350. Dietegen presidiava ina dretgira da cumpromiss episcopala a Cuira il 1396; el ha renovà en pli il contract d'allianza da la Lia da la Chadé il 1406, ha cumandà l'emprima conquista da Clavenna il 1407 ed è daventà cont sin la Fürstenburg en il Vnuost il 1411. Il 1459 han ils de Marmels obtegnì il dretg da burgais da Cuira. Nicolaus è stà avat da Mustér dal 1439 al 1448. Tranter il 1461 ed il 1511 han sis members

da la famiglia studegià ad universitads europeicas, tranter auter Conradin, decan dal chapitel catedral da Cuira 1471-1504, Ulrich, l'emprim Grischun ch'ha predegià la nova cardientscha (enturn il 1523) a Scharons, e ses frar Georg, reformatur dad Eigias (enturn il 1532). Catharina è stada abadessa da Cazas enturn il 1541.

L'exponent il pli influent da la famiglia è stà Conradin ch'ha acquistà enturn il 1500 il signuradi da Razén ed è vegnì nominà in dals trais chaus feudals da la Lia Grischa. La pussanza dals de Marmels è anc s'augmentada cun l'acquist dal signuradi da Lantsch Sut e l'occupaziun da l'uffizi da burgamester da Cuira tras Rudolf e da la podestataria da Castels tras Hans e Hans Jörg 1523-96. La vita pum-pusa sin il chastè da Razén ha mess la famiglia en difficultads finanzialas ch'han sfurzà ella da vender il signuradi (1553). En Lumezia han Conradin (1511) ed Ulrich (mastral Risch) occupà sis giadas l'uffizi dal mastral tranter il 1532 ed il 1556, e Rudolf è stà activ sco landrehter da la Lia Grischa 1625-26 e 1640-41. En il 16avel tschientaner han ils de Marmels mess trais guvernatur, in cumissari e tschintg podestats en las Terras subditas, en il 17avel tschientaner in vicari (Rudolf). La lingia restada en il Surses (Demarmels) è s'impoverida ed ha alura fatg part dal stan puril. Els de Marmels èn stads tranter las familias reticas las pli influentas dal 15avel e 16avel tschientaner.

Conradin de Marmels

*ca. 1440, † 1518, da Murmarera e Cuira. Figl da Hans, chavalier, e dad Ursula nata NN. ∞ 1) Anna von Villenbach nata von Ems, 2) Barbara nata von Sax. Numnà Stelzfuss pervia da sia chommalain. Il 1484 ha Marmels obtegnì en feud da l'uvestg ils regals da chatscha e da las minieras en il Surses. Il 1491 è el stà marschal ereditar da l'uvestg da Cuira e da las claustras da Faveras, Mustér e Maria-munt, ultra da quai vizdum dals bains episcopals sin il Pass dal Set (ospizi da S. Peder). El ha possess ils dretgs e las entradas dal chastè-fortezza e dal signuradi de Marmels (Murmarera), d'ina curtis ad Alvaschagn e da la chasa dal chapitel a Cuira. Il signuradi da Razén, ch'el aveva survegnì en pegn, ha augmentà sia influenza dapi il 1483. Durant l'invasiun da la Vuclina (1486) è Marmels stà in dals chapitanis da las truppas grischunas ed in dals signataris da l'armistizi cun Milaun. Politicamain oscillava el tranter Milaun e l'Austria ch'han accordà ad el pensius. Suenter il passagi (tras barat) dal signuradi da Razén a l'imperatur Maximilian (1497), ha Marmels representà pli fitg

ils interess imperials. Uschia è el era s'opponi il 1497-98 a las alianzas da la Lia Grischa e da la Lia da la Chadé cun ils Confederads. El è tuttina daventà il cumandant principal da las truppas grischunas (8000 schuldads) en la Guerra svabaisa dal 1499. Cunter la voluntad dal cusegl da guerra ha el dentant negozià, ensemen cun l'uvestg, cun l'inimi per in armistizi ch'avev signiftgà la capitulaziun dals subdits da la Chadé da Cuira visavi l'Austria. Els Grischuns èn sa sentids tradids ed han mess Marmels temporar-



In chat extraordinari: ina pergamina medievale anc legibla.

main en fermanza. Marmels è uschia vegnì privà da sia rolla da manader politic e militar. En la Battaglia a la Chalavaina (1499) han auters chapitanis, sco Fontana e Capol, ma era ils figls da Marmels, Rudolf e Hans, surpiglià il commando da las truppas. Sco arbiter en dretgiras da cumpromiss ed administratur dal signuradi da Razén ha Marmels gudagnà pli tard nova stima.

La perscrutaziun

Ina sanaziun cumpletta da la ruina dal chastè ha pussibilità al Servetsch archeologic dal Grischun da realisar ils onns 1987/88 perscrutaziuns da l'istorgia da construcziun vi dals rests da l'edificis ed exchavaziuns sin quel territori. Igl è ina rarità en il chantun Grischun ch'ins chava sin in areal dal chastè. Ma gist ils resultats da las exchavaziuns a Marmels èn impurtants per la perscrutaziun da chatschels en Svizra areguard plirs aspects.

Grazia a la posiziun dal chastè sut in immens nas da grip è la gronda part da la construcziun adina stada protegida da l'aura – in cas da fortuna per la perscrutaziun. Els chats èn uschia restads en il sitg durant tut ils tschientaners. Ultra da la grondezza dal material chattà èn la dimensiu dal chastè e ses stadi da mantegniment excepziunals.

Surtut ils chats organics ch'existan normalmain mo a maniera marginala tar exchavaziuns dal temp medieval èn stads numerus a Marmels: var 1000 parts da laina, tranter auter guaffens, parts da mobiglias e laina da construcziun e da rumment che cumprovan il process da construcziun èn vegnidas chattadas en las stresas exchavadas. Plinavant èn vegnids a la glisch fragments da tgirom e chalers, rests da pergamina, per part perfin cun text, passa 21 000 oss d'animals e 18 000

singuls rests da plantas. Ulteriur material chattà èn stads objects da metal e numerus luadiras che cumprovan la producziun ed elavuraziun da metal, in pau ceramica ed in grond ensemble da vaschs da lavetsch.

Divers objects da laina (laina da construcziun e guaffens) han ins pudì datar segiramain grazia a la dendrocronologia. Qua tras èsi stà pussaivel da datar il cumenzament da la construcziun dal complex fortifitgà enturn l'onn 1140 e sia finiziun vers la fin dal 14avel respectivamain l'entschatta dal 15avel tschientaner. Ma er eveniments capitads durant il temp ch'il chastè era abità han pudì vegnir definids temporalmain a moda pli precisa cun questa metoda.

Notizia per in futur passà

In post-it vi da la frestgera, in agenda cun funcziun da regurdanza sin il smartphone. Enconuschan ins. Ma co han ins fatg quai en il passà per tegnair endament ch'ins avess anc da liquidar insatge en il futur? Ina sort da messadi regurdativ è vegnì chattà en la ruina dal chastè-fortezza da Marmels. Sin ina pergamina da l'emprima mesadad dal 14avel tschientaner vegn regurdà, scrit cun tinta, ch'in tschains stuess anc vegnir incassà. L'adresat e l'emettur na vegnan betg numnads, il document è i a perder u è vegnì bitrà davent. Or da l'optica archeologica è questa pergamina però ina pitschna sensaziun. Nagliur en il Grischun n'è sa mantegnì in manuscrit cumparegliabel. Ma pertge gist en questa ruina? La pergamina è crudada da ses temp en la sfesada dal grip che furmava en il vair senn la «sadella da lavadiras» dal chastè-fortezza. Ed en il clima sitgischem da questa sfessa è sa mantegnida – sper bleras autras restanzas organicas – er la pergamina cun il suandant cuntegn: «Sage ouch



Dissegn dal 1895. Il tract d'abitare (a sanestra) n'è betg pli avant maun.

La presentaziun:
Dossier «Chastè da Marmels».

Dapli infurmaziuns:
chatta.ch/?hiid=3491
www.chattà.ch